

05 SEP 1998

KOMANWEL: 600 SUKARELAWAN MENJAYAKAN ACARA GIMNASTIK

KUALA LUMPUR, 5 Sept (Bernama) -- Sebanyak 600 sukarelawan terlatih akan ditugaskan di Stadium Putra di sini semasa pertandingan gimnastik Sukan Komanwel '98 berlangsung.

"Sukarelawan itu yang termasuk pentadbir dan kakitangan sokongan maklumat akan berada di Stadium Putra untuk membantu para atlit dan penonton," kata Pengurus Sukan Stadium Putra Liew Yeau Kwang kepada Bernama hari ini.

Beliau berkata pentadbir sukan itu berpeluang menguji kecekapan para sukarelawan dan peralatan elektronik di stadium itu semasa Sukan Pra Komanwel yang diadakan sebulan lalu.

Stadium baru itu yang boleh memuatkan 16,000 penonton dirasmikan oleh Perdana Menteri Datuk Seri Dr Mahathir Mohamad bulan lepas, bersama-sama dengan stadium lain di Kompleks Sukan Nasional di Bukit Jalil.

"Kami menjangka ramai penonton akan menyaksikan pertandingan gimnastik memandangkan atlit yang turut serta bertaraf dunia," kata Liew.

Lima belas negara, termasuk negara-negara terkemuka dalam acara gimnastik seperti England, Australia dan Kanada akan mengambil bahagian.

-- BERNAMA

MHI AKD